



Fimfezwanzigschte
Joorgang

Fasnacht 2022

Die Gsalzene

Dr Novak Djokovic – me hett's zur Kenntnis gnoo
Hett Lämbe wäg me positive Thescht bikoo
Aber eins stoot bi im leider Gottes fest
Dr ainzig negativi isch si IQ-Thescht

E Drittel Frauequote wott Gott nid uff Äärde
Sunsch hätt dr Jesus jo e Maitli miesse wäärde
Und dass au Gott kai Frau isch, gseet me doodraa guet
Dass Zalando nid in Himmel liefre duet!

Wotsch mit dr SBB go raise, muesch vyyl warte
Warte, warte, warte, nyt als warte
Und kunsch denn ändligg z'Basel aa wär das jo toll
Hätsch nid wääg' kabutte WC d'Hoose voll!

Zum Thema uriniere wämmer no vrzelle:
Im neie Waggelzug sotsch d'Bysswaar gweerwääg stelle
Doch dass es das nid bruucht das hämmer schnäll begriffe
Will wenn de s'Bier verschittisch, muesch gar nid go schiffe

Mir hänn vom BAG e Telefax bikoo
Und hänn vom Gsangsverbot fir Bänggler Kenntnis gnoo
Unsri Deechtere hänn gfrogt: «Hänn die e Gnaggs?
Und was um Gottes Wille isch e Telefax?»

«Social Distancing» - das isch s'Patäntrezäpt
Mir hänn ai Meter, zwai und ainehalb erläbtt
Fir Basel / Ziiri sinn mir schnäll uf d'Leesig koo
Und wurde s'gärn bi 90 Kilomeeter loo

Monscherväars 1

Zum die scheeni Fasnacht ooni COVID z'gniessse
Hämmer uns fir's Boostere aamälde miesse
Und zum dä Schuss z'bikoo, nid moorn – vyyl besser hytte
Hämmer sofort bi dr Impfhotline aaglytte

E nätti Frauestimm nimmt ab – mir wänn grad starte
Doch s'isch e Doonband wo uns danggt – mir solle warte.

Denn heert me Musik, denn e Stimm - ganz rueig, nid ghetzt:
«Unsri Laitige sinn laider alli bsetzt»

Inzwische sinn scho eppe 10 Mynuute duure
Und mir sinn effegdiv scho zimligg uff dr Schnuure

Denn kunnt die scho bekannti Stimm – s'isch zum verlaide:
«Als näggschtes mien Sie jetzt d'Bedienigssprooch entschaide:

Drugge si 1 für Mandarin – 2 für Kirgisisch
3 für Sanskrit oder 4 für Portugiesisch
5 für Norwägisch und 6 fir alli Finne»

Mir loose zue und frooge uns, ob die denn spinne

Und jetz beschlycht uns Angscht, die duet uns zimmligg gwääle
Am Schluss kennt uns fir Dytsch sogar e Thaschte fääle

Denn e Hoffnigsschimmer – isch dä wool zue rächt?
Unsri Frauestimm frogt uns noch unsrem Gschlächtt:

«Männer sinn mit Drugg uf 1 grad regischtriert
Thaschte 2 isch fir Transgender reserviert
Thaschte 3 wenn Si sich fiele wie ne Frau
Und 4 wenn Si sich saage: weiss es nooni gnau»

Mir sinn nervees und drugge irrümligg e Thaschte
Schon simmer wieder bi Schritt 1 – noch am Ussraschte

E Stund isch umme und das Ganze stresst uns bees
Schwääri Augeliider – bald scho komatees

Die Impf-Hotline belaschtet uns daatsächligg fescht
Us Langewill mache mir schnäll e COVID-Thescht
Und dä Schnällthescht – es wird Eich jo nid erstuone
Isch positiv - und das versaut uns heftig d'Luune
Jetz mien mir d' Hotline wäggsle, es isch zum verflueche!
Und geen d'Nummre vo dr Theschthotline go sueche

Mir wääle sofort d'Thescht-Hotline – e Stimm goot draa:
«Si lytte usserhalb de Byyrozitte aal »

Monscherväars 2

Mir Gsalzene – s'isch trivial
Sinn als Bangg glyymanedraal
Pro Furz dien mir im grosse Ganze
Jedesmool e Baimli pflanze

Bolitigger – die miest me zwinge
Pro Furzidee e Baimli z'bringe
Mit dämm Misch wo die broleete
Bewaldisch logger 10 Blaanete!

Unsri Kinder dien skandiere
Fir s'guete Glyyma demonschtriere
Und s'Mami faart se – voll drbyy
Zur Demo mit em SUV

Goorpse d' Säi und fuurze d' Kie
Macht das de Glyymaschitzer Mie
Drum regiere – s' kunnt no digger
Bald die vegane Käärnlibigger

Veganer ässe – sone Drägg
Unsrem Ässe s'Ässe wägg
In unserer Stammbeiz gitt's nyt z'welle
Do kenne si nur s' Taxi bstelle

Und sinn Veganer schliessligg doot
Isch glaar was uff em Graabstai stoot:
«Er hat – Ihr sollt es alle wissen
Das letzte Mal ins Gras gebissen.»

Wenn d'Meeresspiegel iberboorde
Kemme us Holland Flichtlingshoorde
Dr Voordail hämmer schnäll begriffe
Die bringe ganz viil Stoff zum kiffe

Am Nordpol spyyrt me ganz diräggt
Dä globaali Haiz-Effäggt
Wenn d' Eskimo Banane pflanze
Friert's de Pinguin nimm an Ranze

Dert oobe isch e some stolze
Eskimo si Iglu gschmolze
S liggd nit am Klima hett är checkd
Er hett s'Glettyyse nid usgsteggd!

Schmilzt s' Poolaryys eso wyter
Wird's au in dr Wieschti schyter
Denn bruucht dr Beduin in Noot
Fir si Kameel e Rettigsboot!

Die Situation kennt eskaliere
Wie sotti d' Schwyz druff reagiere?
S' gitt nur ai Wäg us däre Noot
Die Gsalzene in Bundesroot!

Die Gsalzene findsch im Facebook und unter:

www.diegsalzene.ch

Wotsch d Fasnacht mol vo inne gsee - kumm doch zue dr BSG!

www.schnitzelbangg.ch